

BERNASSOUN

Lou Felibre de Coumbo-Malo

PASSEJADO

Un tantost d'aquest mes de janvié: — Tè, me diguère, anen ausi Bernassoun!

Jalavo en l'èr, lou mistrau bramavo, e tóuti li font dóu couvènt avien li candeletto. Mistralado e jalado fan ges de pòu i prouvençau, pas mai que li dardaiado dóu souleias d'avoust. Acò vous reviscoulo e vous remounto. Zóu! parten!

E mandèrè capèu de-vers Avignoun, en seguissènt un galant draioulet, que fai lou mounto-davalo à travès la Mountagneto. Èro bravo aquelo escourregudo, en plen vènt, dins li pinedo que van s'esperloungeant, de valounado en valounado, desempièi lou terraire de Gravesoun fin-qu'à la tourre Barbentano. E lou poulit amiradou! Aperalin, lou bàrri dis Aupiho bluio; aperamount, lou Ventour emé soun capèu blanc; en bas, la vilo d'Avignoun emé soun palais papau e si dous Rose m'apareissien, dins uno nevolino de pousso, coume un païsage ideau de Palestino.

E tau que li pastre, quouro anavon en Betelèn, caminave, galoi; em'acò me revenien en tèsto li refrin de Sabòli lou Mountelen:

Pèr noun langui long dóu camin,
Counten quauco sourneto;
Sus lou fifre e lou tambourin
Disen la cansouneto.